

ԱՆԲԵՐԳԸ X—XI ԴԱՐԵՐՈՒՄ

Անբերդի մասին առաջին գրավոր հիշատակությունը վերաբերում է XԴ դարի սկզբին: Նախորդ ժամանակաշրջանների վերաբերյալ գրավոր աղբյուրների բացակայությունը խիստ դժվարացնում է որոշակի խոսել այդ մասին:

3-րդ և 2-րդ հազարամյակների ընթացքում Հայկական լեռնաշխարհը ծածկվեց, այսպես կոչված, կիկլոպյան ամրոցների խիտ ցանցով: Այդ ժամանակվա մարդիկ հաճույքով էին բնակեցնում լեռնաշխարհի բարձրագույն վայրերը և իրենց ամրոցները մեծ մասամբ կառուցում էին երկու գետերի միախառնումից առաջացած հովանդանների վրա: Այս տեսակետից Անբերդի դիրքը միանգամայն նպաստավոր էր: Նրա պարսպապատերի մեջ հարավ-արևելյան և հյուսիս-արևելյան մասերում պահպանվել են շարքեր, որոնք հիշեցնում են վերոհիշյալ կիկլոպյան կառույցները: Անբերդից ընդամենը 4 կմ արևելք գտնվող կիկլոպյան ամրոցի դիրքը շատ ավելի աննպաստ է, քան Անբերդինը, և վերջապես Անբերդի շրջապատում գտնվող ուրիշ նման ամրոցների առկայությունը, կարծես թե, կասկած չի թողնում, որ Անբերդը նույնպես եղել է կիկլոպյան ամրոց:

Անբերդի հնագիտական պեղումները այս հարցի առթիվ տվել են միանգամայն բացասական արդյունքներ: Միջնադարյան շերտից ներքև ոչ մի կուլտուրական շերտ մինչև այժմ հնարավոր չի եղել հայտնաբերել: Հավաքովի (подъемный) նյութը նույնպես ոչինչ չի տալիս այս շրջանի համար:

Ուսումնասիրողներից Թ. Թորամանյանը, Հ. Օրբելին և ուրիշները Անբերդը համարել են նախնադարյան կամ նախաքրիստոնեական ժամանակներում կառուցված²:

Անբերդի հնագիտական պեղումները ցույց են տալիս, որ վաղ միջնադարում նույնպես Անբերդում բնակություն չի եղել:

Անբերդի բարձր լեռնային դիրքը (ծովի մակերևույթից շուրջ 2300 մ բարձր), նրա կտրվածությունը կարևոր ճանապարհներից, ինչպես նաև նրա խստաշունչ կլիման, մարդու մշտական բնակության համար հարմար չեն: Այդ է պատճառը, որ ոչ միայն անցյալի շատ ժամանակաշրջաններում, այլև այժմ, այն անմարդաբնակ է: Երկրի նորմալ պայմաններում Անբերդը բնակեցվել չէր կարող: Նրա բնակեցումը հնարավոր էր միայն կիկլոպյան ամրոցների դարաշրջանում, երբ, ինչպես նշեցինք, նման վայրերը հաճույքով էին բնակեցվում: Նրանից հետո եկող ամրողջ երկու հազարամյակների ընթացքում, մինչև Բագ-

¹ Այս հարցը միշտ էլ զրադեցրել է ուսումնասիրողներին, այդ է պատճառը, որ թե՛ 1936 թ. և թե՛ 1964 թ. հատուկ պեղումներ են կատարվել ամրոցի այն մասերում, ուր ամենից ավելի հավանական էր կիկլոպյան կառույցներին վերաբերող շերտի առկայությունը: Սակայն պեղումները մինչև մայր հող հասնելը նման շերտ հայտնաբերել չեն կարողացել:

² Թ. Թորամանյան, Նյութեր հայ ճարտարապետության պատմության, հ. 2, Երևան, 1948, էջ 114:

րատունիների թագաւորութիւնը, Անբերդը անմարդաբնակ է եղել: Մեր ուսումնասիրութիւնները ցույց են տւել, որ Հայաստանի կիկլոպեան ամրոցներից շատերը ուրարտական կամ նախաուրարտական շրջանից հետո ամայացել են երկար ժամանակով, և միայն X դարից սկսւում է նրանց մասսայական բնակեցումը³: Ընդհանրապէս պետք է նկատել, որ ամրոցաշինութիւնը Հայաստանում լայն ծաւալ է ստանում սկսած X դարից: Դա ելնում էր երկրի քաղաքական, ռազմական և տնտեսական կացութիւնից: Բանն այն է, որ Արշակունյաց, ինչպէս և նրանից հետո եկող մարզպանական շրջանում Հայաստանը կարողանում էր 70—80 հազարանոց բանակներ հանել: Հայերը ի վիճակի էին թշնամուն բաց դաշտում երկրի սահմանների մոտ ճակատամարտեր տալու և շատ անգամ ստիպելու նրան շմտնել երկրի խորքը: Հիշենք Ջիրավի, Խաղխաղի, Աւարայրի ճակատամարտերը:



Այլ էր վիճակը Բագրատունյաց շրջանում (արաբական շրջանի մասին չենք խոսում, քանի որ երկիրը նրանց իշխանության տակ էր): Բոլոր ճակատամարտերը այժմ տեղի էին ունենում արդեն ամրոցների օգնութեամբ, նրանց շուրջը (այստեղ մենք նկատի ունենք նաև Անի մայրաքաղաքի և մյուս քաղաքների հզոր պարսպապատերը, որպէս ամրոցներ): Արժե հիշել, որ բյուզանդական զորքերի դեմ վճռական ճակատամարտերը տրւում էին մեծ մասամբ

³ Պեղվող հուշարձաններից լճաշենում և Ն. Արմավիրում հետեյալ պատկերն է. ուրարտական շերտի վրա անմիջապէս նստած է միջնադարյան շերտը, որը թվագրվում է երկու տեղում էլ ոչ շուտ քան X դարը:

ոչ թե սահմանին մոտ, այլ հենց Անի մայրաքաղաքի պարիսպների տակ⁴։ Ճակատամարտերն էլ արդեն առաջվա մասշտաբները չունեին։ Բագրատունի թագավորները կարողանում էին հանել մինչև 30 հազարանոց զորք։

Բագրատունի թագավորներն, սկսած Աշոտ Նրկաթից, երբ վերջապես հնարավոր եղավ վտարել արարներին Հայաստանից, ամեն կերպ ամրացնում էին երկիրը։ Հսկայական շափերի հասավ այս շրջանում ամրոցաշինությունը։ Ամրացվում էին հին ամրոցները, կառուցվում էին նորերը, երկրի վրա անընդհատ կախված արաբական արշավանքների վտանգը ստիպում էր հայերին վերաշինել նաև կիկլոպյան ամրոցներ։ Ամրոցներ կառուցվում էին նաև բարձր լեռնային շրջաններում։

Մեր վերը բերած փաստերը ոչ մի կովան չեն տալիս հաստատելու Անբերդի նախորդ շրջաններում գոյություն հարցը։ Գոյություն ունե՞ր Անբերդ ամրոցը մինչև Բագրատունիների թագավորությունը։ Դժվար է ասել։ Դեռ ավելին. Բագրատունյաց թագավորության սկզբնական շրջանում, մինչև X դարի առաջին տասնամյակները, եթե գոյություն ունեւր Անբերդը, ապա այն սովորական բնակավայր էր և ոչ թե հզոր ամրոց։ Այդ բանը պարզ է դառնում Դրասխանակերտցու անուղղակի վկայություններից։

Նա պատմում է, թե ինչպես արաբներից հալածվելով, ապաստանում է նախ Այրիվանքում, ապա Սևանում և հետո գալիս է իր «ձեռակերտ ամրոցին՝ Բյուրական»։ Այնուհետև, իմանալով, որ արաբները Բյուրականում էլ իրեն հանգիստ չեն տալու, հեռանում և գնում պատսպարվում է Բագարանում։ Արաբները հարձակվում են Բյուրական ամրոցի վրա։ Յոթ օր ամրոցականները համառ դիմադրություն են ցույց տալիս, սակայն արաբները կարողանում են գրավել, հիմնահատակ կործանել այն և կոտորել բնակիչներին։ Բյուրականի ավարը առած նրանք գնում են Դվին⁵։

Այս ամրոցից այժմ ոչ մի հետք չի մնացել, սակայն Դրասխանակերտցու կառուցած «հաստահեղոյս կոփածոյ քարամբք, պերճապաճոյճ պճնողութեամբ նկարակերտ յօրինուածով» եկեղեցին մինչև այժմ էլ կանգուն է և գտնվում է Բյուրական գյուղում։ Սրա շրջապատում էլ եղել է ամրոցը, որը Անբերդից գտնվում է ընդամենը 6—7 կմ հեռավորության վրա։ Այս հանգամանքը ստիպում է կարծելու, որ Բյուրական ամրոցի զրավման և կործանման ժամանակ Անբերդ ամրոցը գոյություն չունեւր, կամ արդեն ավերակ էր։ Նախ, եթե այն գոյություն ունենար, դժվար թե կաթողիկոսը իր գանձերը տաներ Բյուրական և ապաստաներ Բյուրականում։ Այնուհետև, Անբերդը չէր կարող անտարբեր ականատես լինել Բյուրականի ճակատագրին։ Հարկ է նշել, որ Բյուրականի շրջապատի զորականները, լսելով արաբների նպատակը Բյուրականը դրավելու մասին, «...դիմելով ուստեք ուստեք մտանէին յամրոց անդր թիկունս տալ հաւատացեալացն մինչ ի կէտ մրցման մահու»⁶։ Այստեղ նույնպես

⁴ Պատահական չէ Բագրատունիների Անին մայրաքաղաք դարձնելը, երկար որոնումներից հետո նրանք կանգ առան Անի ամրոցի վրա։ Դա սլալմանավորված էր նախ Անիի դիրքով։ Դաշտավայրում գտնվող մայրաքաղաքները՝ Դվինը, Վաղարշապատը, Արտաշատը և ուրիշներ չունեին Անիի անառիկությունը։ Հատկանշական է նաև, որ Անին մայրաքաղաք դառնալուց հետո սլատրաստվեց շատ հուսալի և ամուր պարիսպներով, որպիսիք չունեին մեր մայրաքաղաքներից և ոչ մեկը։

⁵ Հովհաննես Դրասխանակերտցի, Պատմություն Հայոց, Թիֆլիս, 1912, էջ 336—337։

⁶ Նույն տեղում, էջ 341։

չի նշվում Անրերդի անունը: Վերջապես, Բյուրականը գրավելուց հետո արաբները չէին կարող չգրավել Անբերդը, եթե այն գոյություն ունենար:

Բյուրականի ամրոցի ավերումը վերաբերում է X դարի սկզբին: Դրանից հետո այն չի վերականգնվում: Սրանից հետո է միայն, որ հանդես է գալիս Անբերդ ամրոցը, և մեզ թվում է, թե դա պատահական չէ: Հաշվի առնելով նախորդ փորձը, այս անգամ ամրոցը կառուցվում է ավելի անառիկ վայրում՝ Բյուրականից հյուսիս երկու զետեբի միախառնումից առաջացած հրվանդանի վրա: Դրանից հետո Բյուրականի ամրոցը այլևս չի հիշատակվում: Անբերդի առկայությունը, հավանաբար, ավելորդ էր դարձնում Բյուրականում ամրոց ունենալը: Այդ է պատճառը նաև, որ XI դարում եպիսկոպոսական աթոռը Բյուրականից տեղափոխվում է Անբերդ:

Այժմ հետաքրքիր է պարզել, թե Բյուրականի կործանումից ինչքան ժամանակ հետո կառուցվեց Անբերդը:

Հայաստանի միջնադարյան ամրոցներից շատերը ժողովուրդը կապում է Աշոտ Երկաթի անվան հետ: Անբերդը նույնպես կոչվում է Աշոտ Երկաթի բերդ: Ժողովուրդը Արխաշանի ձորի մեջ ցույց է տալիս ժայռի վրա փոս ընկած մի տեղ, որը, ըստ ավանդության, Աշոտ Երկաթի ոտքի տեղն է: Աշոտ Երկաթի անվան բերդեր շատ են հայտնի Հայաստանում, և բոլոր բերդերը կառուցված են միջնադարում:

Ընդունված կարծիք է, որ այդ բոլոր բերդերից և ոչ մեկն էլ Աշոտ Երկաթը չի կառուցել և որ, առհասարակ, ոչ մի առևտրություն չեն կարող ունենալ Աշոտ Երկաթի հետ: Մեծ մասամբ դա բացատրում են նրանով, որ Աշոտ Երկաթը ժամանակ և միջոց չունեն ամրոց կառուցելու համար: Մենք նման պատճառաբանության համաձայն չենք:

Նախ, ժողովրդական ավանդություններն ու զրույցները անպայման որևէ հիմք կունենան, չի կարելի դրանք ժխտել առանց հակառակ փաստ ունենալու և այն ապացուցելու: Անշուշտ, ժողովրդական ավանդությունների և զրույցների մեջ շատ բան չափազանցված կարող է լինել և հարմարեցրած, սակայն պատմական հիմքեր անպայման ունեն: Պետք է մտածել այն մասին, թե ինչու մեր ամրոցները կապվում են հատկապես Աշոտ Երկաթի հետ: Չէ որ Տիգրանի, Արշակի, կամ Մամիկոնյան իշխաններից որևէ մեկի անվան հետ դրանք չեն կապվում, այլ միայն Բագրատունիների և այն էլ միայն Աշոտ Երկաթի հետ: Դա բացատրել միայն նրանով, որ Աշոտ Երկաթը սիրելի է եղել ժողովրդին, ճիշտ չէ, բանի որ ժողովուրդը վերահիշյալ գործիչներին պակաս չի սիրել:

Ինչպես իր տեղում տեսանք, ամրոցների դերը երկրի պաշտպանության գործում ուժեղանում է հենց Բագրատունյաց շրջանից սկսած: Բագրատունի թագավորները, մինչև Աշոտ Երկաթը, չէին կարող բերդաշինության լայն գործունեությամբ զբաղվել, բանի որ արաբները դեռ երկրում էին և առաջին բանը, որին արգելք էին հանդիսանում, Հայաստանի բերդերի շինարարությունն էր⁷: Միայն Աշոտ Երկաթը հնարավորություն ունեցավ արաբներին դուրս վռնելու երկրից և զբաղվելու երկրի ամրացմամբ՝ ռազմական տեսակետից: Իսկ երկրի ամրացումը նախ և առաջ նշանակում էր ամրացնել, վերանորոգել

7 Շատ փաստեր են հայտնի, որ արաբները ինչպես Հայաստանը գրավելու, այնպես էլ իրենց տիրապետության շրջանում բազում ամրոցներ էին ավերում:

ամրոցները, զինվորական ուժը կարգի բերել: Այդ է պատճառը, որ Աշոտ Երկաթը ամրացնում է ամբողջ երկիրը և այն դարձնում ռազմական ճամբար, այլ կերպ վարվել էլ չէր կարող: Արաբների ներխուժման վտանգը անընդհատ կախված էր երկրի վրա և Աշոտ Երկաթը ամեն ինչ պետք է աներ երկիրը փրկելու համար: Այդ Վ պատճառը նաև, որ նա կոչվեց Երկաթ, որի մասին հանդորդում է մեզ Ասողիկը: Հետաքրքիր է նշել, որ Աշոտ Երկաթի ամրացաշինության մասին ուղղակի նշում է Դրասխանակերտցին.

«...Գրեթէ իբրև զարծուի սաւառնաթև սլացեալ ընդ օդս, այնպէս սրավարեալ խոյանայր զկնի գիշատեալ այլազգեացն, որք ասպատակ սփռեալ տարածեալ էին ընդ երեսս երկրի մերում. և նախ քան զամենայն ինչ ի փոքր մի վայրկեան ժամանակի յինքն առհասարակ գրաւեալ նուաձէր զբոլոր իսկ ամրոցս տէրութեան հօր իւրոյ, զոր առեալ կալեալ էր ոստիկանին: Եւ զորս միանգամ պահնակս անդ ՚ի Սառակինոսացն գտանէր՝ սուր սուսերի մաշէր. և պատուարօք և պահնակօք և բազում ռոճկօք զամուրսն ամրացուցեալ՝ և ինքն զհետ թշնամեաց կրթէր...»⁸:

Ինչպես տեսնում ենք, Աշոտ Երկաթը նվաճած ամրոցների արաբական զորքը կոտորում էր և կայազորով (պահնակօք), պարիսպներով (պատուարօք) և մթերքով (ռոճկօք) ամրացնում էր այն և ինքը հետապնդում էր թշնամիներին: Բնական է, որ հարկ կլիներ որոշ վայրերում կառուցել նոր ամրոցներ: Դրասխանակերտցու մոտ Աշոտ Երկաթի կողմից նոր ամրոցներ կառուցելու մասին խոսք չկա: Սակայն պետք է հաշվի առնել, որ վերոհիշյալ հատվածը վերաբերում է Աշոտի իշխանության այն շրջանին, երբ նա ղեռ ապատագրում էր Հայաստանը արաբներից: Հայտնի է, որ Աշոտը երկիրը ազատագրելուց հետո 10 տարի էլ խաղաղ թագավորեց: Հենց այս շրջանում է, որ նա շոողանալով երկրի ապահովության մասին, կարող էր կառուցել նոր ամրոցներ: Այս վերջին տարիների իրադարձություններին Դրասխանակերտցին, թեև ականատես էր, սակայն դրանք չի նկարագրել: Պարզ է, որ Դրասխանակերտցու չէինք կարող պահանջել, որ նա նկարագրեր ղեկավար մինչև իր մահը:

Արժե նշել, որ Աշոտ Երկաթին բացի բերդերից, ուրիշ կառույցների շինարարություն չի վերագրվում՝ ինչպես եկեղեցիների, կարավանատների, նույնիսկ կամուրջների և այլնի:

Ուրեմն, Աշոտ Երկաթը, ինչպես մենք Դրասխանակերտցու ուղղակի վկայությունից էլ տեսանք, պետք է ամրացաշինական մեծ գործունեություն ծավալած լիներ, որ միայն նրան է մեր թագավորներից և գործիչներից վերադրվում ամրացաշինությունը:

Մենք չենք պնդում, բայց հնարավոր ենք համարում, որ իր կյանքի վերջին տարիներին Աշոտ Երկաթը կառուցած կամ ամրացրած լինի Անբերդ ամրոցը: Այդ բանը մեզ ավելի հավանական է թվում այն պատճառով, որ Արագածոտնը գտնվելով Շիրակի թագավորության արևելյան կողմում, պետք է ավելի խիստ ամրացվեր և առանձին հոգածության առարկա լիներ Աշոտ Երկաթի համար, քանի որ ղեպի Շիրակ՝ Բագրատունիների մայրաքաղաքները (Բագարան, Երազգավորս, այնուհետև նաև Անի) թե՛ հարավային և թե՛ արևելյան կողմերից թշնամին անցնելու էր Արագածոտնով: Այսպիսով, Անբերդի կառուցման ամենահավանական ժամանակը, մեր կարծիքով, X դարի սկիզբն է:

⁸ Դրասխանակերտցի, նշված աշխատությունը, էջ 243.

Ուսումնասիրողներից շատերը կամ չեն խոսել Անբերդի X դարից առաջ կառուցելու մասին, կամ այն համարել են X դարից հետո կառուցված: Ճարտարապետ Թ. Թորամանյանը գրում է, որ զղյակը և պարիսպները հազիվ IX—X դարու գործ են երևում⁹: Միայն ճարտարապետ, արվեստագիտության դոկտոր Ն. Տոկարսկին է, որ ենթադրում է, թե Անբերդը կառուցվել է VII դարում: Նա իր «Архитектура Армении IV—XIV вв.» գրքում Անբերդը տեղադրում է V—VII դարերի ճարտարապետության բաժնում և գտնում, որ Անբերդը սկզբնապես կառուցվել է VII դարում: Նա գրում է. «Անբերդ և Արխաշան լեռնային գետերի միացումից առաջացած հրվանդանի վրա VII դարում կառուցվել է Անբերդի բազմահարկ զղյակ-պալատը, որից այն կողմը, գետի միացման ժայռապատ հրվանդանի վրա տեղավորված է եղել ոչ մեծ բնակավայրը, որտեղ ապրում էին զղյակի սպասավորները: Պալատը հետագա 6—7 դարերի ընթացքում մի քանի անգամ վերակառուցվել և ամրացվել է, իսկ հրվանդանի վրա աճող բնակավայրը պաշտպանելու համար կառուցել են նոր պարիսպները»: Այնուհետև «բնակավայրը սկզբում զբաղեցնում էր հրվանդանի մի մասը, որը հարում էր պալատին. այն շրջափակված էր կիսակլոր աշտարակներ ունեցող քարակերտ պարիսպներով, իսկ Անբերդաձորի կողմից՝ պալատի ստորին մասում գտնվող դարպասով: Կարելի է ենթադրել, որ զղյակի բնակիչները այստեղ ունեցել են եկեղեցի, որի ավերակները մինչ այժմ մնացել են հողի տակ»¹⁰:

Սակայն, ինչպես տեսանք, թե՛ հնագիտական նյութը և թե՛ պատմական տեղեկությունները նման տեսակետի օգտին չեն խոսում:

Ինչպես նշեցինք, Անբերդի մասին առաջին գրավոր հիշատակությունը վերաբերում է XI դարի սկզբին: Վարդան Բարձրաբերդցին գրում է.

«Ի շորեքհարիւր քառասուն և չորս թուին մեռաւ Գագիկ տուեալ զթագաւորութիւնն երից որդւոց իւրոց՝ Յովհանիսի, Աբասայ և Աշոտոյ: Զթագն տայ Յովհանիսի, և ԿԱնի և զՇիրակ, զսուրբ Գրիգորոյ Յորովն Աշոտաց. զԱնբերդ և զգաշտն Արարատեան, զԿայեան և զԿայծոն և Տաւուշ գաւառն Սեւորտաց. և զայլ մնացեալսն Աշոտի և Աբասայ բաժանէ»¹¹: Մեջբերածից երևում է, որ Գագիկ թագավորի ժամանակ Անբերդը շատ կարևոր ամրոց էր: Այդ է պատճառը, որ Գագիկի մահից հետո այն անցնում է Հովհաննես-Սմբատին:

Մյուս գրավոր տեղեկությունն Անբերդի եկեղեցու հյուսիսային մուտքի վերևի արձանագրությունն է.

1. Ամին ՆԶԵ
2. Ես իշխանս Վահրամ շի
3. Նեցի գկաթողիկես աթոռ
4. Հայրապետական եւ սահման
5. Եցի պտուղն...¹²:

9 Թ. Թորամանյան, Նյութեր հայ ճարտարապետության պատմության, Երևան, 1948, էջ 174:

10 II. M. Токарский, Архитектура Армении IV—XIV вв., Ереван, 1961, стр. 42, 44.

11 «Հաւաքումն պատմութեան Վարդանայ Վարդապետի», Վենետիկ, 1862, էջ 92:

12 Արձանագրությունը հրատարակված է Երվ. Տեր-Մինասյանի «Անբերդաձորի հնությունները» հոդվածում (տե՛ս «Էջմիածին», 1961, Ե., էջ 50—51): 1936 թ. արշավախմբի ընթացքում արձանագրության լրիվ տեքստը արտադրելու վերձանել են Ս. Բարխուդարյանն ու Կ. Վաթարյանը:

Այնուհետև սահմանվում են Անբերդից, Արագածոտնից և այլ տեղերից զանձվող հարկերի չափը:

Արձանագրությունից երևում է, որ 1026 թվականին ավարտվում է Վահրամաշեն եկեղեցու կառուցումը: Հավանաբար, Վահրամ Պաշլավունին հեղինակ էր նաև Անբերդի այլ կառույցների: Պետք է ենթադրել, որ Վահրամ Պաշլավունին ամրացրել կամ վերանորոգել է ամրոցը, սակայն այն ժամանակ սովորություն չկար նման գործերի մասին խոսել արձանագրություններում¹³:

Առանձնահատուկ էր Պաշլավունիների դերը Բագրատունյաց թագավորության մեջ: Դժվար է ասել, թե որտեղ էին վերջանում Բագրատունիների տիրակալության սահմանները և որտեղ սկսվում Պաշլավունիներին: Պաշլավունիները հիմնականում բնակվում էին Անիում, սակայն սրանք տիրույթներ ունեին թե՛ Շիրակում, թե՛ Արագածոտնում և թե՛ երկրի այլ վայրերում: Պաշլավունիները Բագրատունի թագավորների ամենահավատարիմ իշխաններն էին, և իրենց ամբողջ ուժն ու եռանդը ներդնում էին երկրի ընդհանուր շահերի պաշտպանման գործին: Այդ է պատճառը, որ Անբերդի նման խոշոր նշանակություն ունեցող ամրոցն էլ, ինչպես և երկրի պաշտպանության գործը ընդհանրապես, վստահվում էր նրանց:

Պաշլավունիների դերը առանձնապես աճեց XI դարից սկսած: Հովհաննես-Սմբատ և Գագիկ II թագավորների ժամանակ այն ավելի ուժեղացավ: Հովհաննես-Սմբատի ոչ ռազմական և թուլամորթ լինելու պատճառով երկրի ռազմական գործի կառավարումը, ինչպես և իշխանության հետ կապված շատ հարցերի հոգսը ընկավ Պաշլավունի իշխանների վրա: Նրանցից հատկապես Վահրամ Պաշլավունին աչքի ընկավ իր հայրենանվեր գործերով: Այդ ժամանակ էր, որ ուժեղացավ բյուզանդական ագրեսիան: Բյուզանդական կայսրերը տարբեր ճանապարհներով աշխատում էին գրավել Անին և վերջ դնել Շիրակի թագավորությանը: Վահրամ Պաշլավունու անվան հետ են կապված Անիի պարիսպների տակ հայ ժողովրդի տարած փայլուն հաղթանակները: Առանց չափազանցության կարելի է ասել, որ Վահրամ Պաշլավունին, մանավանդ կյանքի երկրորդ կեսում, Բագրատունյաց Հայաստանի ամենաազդեցիկ մարդն էր: Բյուզանդական խարդախ քաղաքականությանը՝ երկրի իշխաններին պառակտելու և Բագրատունի թագավորներին հակադրելու ձգտմանը, նա հակադրեց սեփական հայրենիքի հավատարմության, երկրի բոլոր իշխաններին Բագրատունի թագավորների դրոշի տակ համախմբելու, ռազմական ուժերը մեկ ընդհանուր հրամանատարության տակ կենտրոնացնելու քաղաքականությունը:

Երկրի պաշտպանության համար խիստ կարևոր նշանակություն ունեին բերդերը: Նա ամրացրեց Անին պաշտպանող բերդերի օղակը, որտեղ առանձնահատուկ դեր ունեին Անբերդը: Վերջինս զարձավ Պաշլավունու հատուկ հոգածության առարկան:

Դրանից մի քիչ անց Անբերդում տեսնում ենք նաև Գրիգոր Մագիստրոս Պաշլավունուն, որին տեսակցության է գալիս Սարգիս Վարդապետը «...առաքեալ ի մանկամիտ արքայէ...»¹⁴, Մանկամիտ արքան, հավանաբար, Գագիկ II-ն էր, որի հետ այդ ժամանակ զոտված էր Մագիստրոսը, և Սարգիս վարդապետին ուղարկում է նրա սիրտը շահելու համար:

¹³ Այդ սովորությունը հանդես է գալիս հետո՝ XII—XIII դարերից սկսած:

¹⁴ «Գր. Մագիստրոսի թղթերը», Ալեքսանդրապոլ, 1910, էջ 65:

Այս դեպքից շատ շանցած, 1045 թ. Գապիկ 11-ը կանչվում է Կոստանդնուպոլիս: Մոնոմախ կայսրը նրան ստիպում է հրաժարվել Անիից:

Սակայն պայքարը Անիի համար շարունակվում էր: Անեցիները փորձում են այն հանձնել վրաց Բագրատ Դ թագավորի մորը: Այս մասին հետաքրքիր տեղեկություն է պահպանել XI դարի վրաց անանուն ժամանակագիրը. «Ապա կրկին հզորացավ և ուժեղացավ իր «հայրենիքում» Բագրատ վրաց թագավորը: Եվ Բագրատի բախտը բանեց թե ոչ՝ Վեստը (նրան) միացավ Անվո ինն բերդերով, բացի Անբերդից: Եվ անեցիք տվին Անին Բագրատի մորը, քանի որ այն հայերի «հայրենիքն» էր, իսկ Բագրատի մայրը՝ Մարիամ թագուհին, հայոց Սենեքերիմ թագավորի դուստրն էր»¹⁵:

Հետաքրքիր է, որ Վեստ Սարգիսը, որը վարում էր բյուզանդամոլ քաղաքականություն, Անին և նրան շրջապատող բերդերը հանձնում էր վրացիներին: Տվյալ դեպքում մեզ համար ամենից կարևորը Անբերդի հարցն է: Նախ, պարզվում է, որ Անբերդը Անիի 9 կամ 10 բերդերից մեկն էր: Բացի այդ, այն միակ բերդն էր, որ չհանձնվեց վրացիներին: Իսկ պետք է բացատրել, նախ, Անբերդի անառիկությունը: Անբերդիցի վստահ էին իրենց ամրոցի վրա: Բացի այդ, այդ ժամանակ պետք է Անբերդ տեղափոխված լինե՞ր Վահրամ իշխանը, որը, հավանաբար, ոչ միայն Անբերդը, այլև ամբողջ Հայաստանը որևէ մեկին հանձնելուն դեմ էր:

Հավանաբար, Անբերդը մնաց Վահրամ Պահլավունու ձեռքում մինչև նրա մահը, որը տեղի ունեցավ 1048 թվականին՝ Իվնո պարիսպների տակ: Նրա հետ զոհվեց նաև որդին՝ Գրիգորը:

Սրանից հետո Անբերդի, ինչպես և Հայաստանի շատ վայրերի բախտը անորոշ էր: Բյուզանդացիք շուտով տիրեցին Անիին: 1046 թվականին Գրիգոր Մագիստրոսը Բջնին հանձնել էր բյուզանդացիներին: Բյուզանդացիք տեր դարձան Անբերդին: Անհայտ է: Այս անհաստատ վիճակին շուտով վերջ դրին սելջուկները, որոնք Անբերդը գրավելով դարձրին իրենց կարևոր հենակետերից մեկը:

С. В. АРУТЮНЯН
АНБЕРД В X—XI ВВ.

Р е з ю м е

В статье рассматривается Анберд, как одна из мощных крепостей средневековой Армении. Находясь на восточных границах Багратидского царства и входя в состав оборонительной системы района Арагацотн, Анберд в X—XI вв. служил преградой при нашествии арабов со стороны Атрпатакана через Арагатскую долину на Ширак. Этим и объясняется особая забота князей Багратидов и Пахлавуни о дальнейшем укреплении крепости.

Далее затронут вопрос о существовании Анберда до X века. Отсутствие археологического материала (до X в.) и исторических данных не дает основания утверждать о существовании Анберда до X века. Учитывая это, а также местонахождение крепости, автор полагает, что Анберд до X века либо не существовал, либо существовал как обыкновенное поселение.

¹⁵ «Վրաց անանուն ժամանակագիր» (XI դար) (տե՛ս Մ Ե Լ Ի ք ս Ե Թ-Բ Ե Կ, Վրաց աղբյուրները հայերի մասին, հ. 1, էջ 205—206):